

29. september 2021

UKA 2021/130

Kalaallit Nunaanni pinerluttulerinermik inatsimmik aamma Kalaallit Nunaanni eqqartuussisarnermik inatsimmik allanngueq pillugu inatsisissatut siunnersuut (Covid-19-imik il. il. tunillaassuunnerit pinaveersaartinniarlugit akiorniarlugillu iliuusissanik atorunnaarsitsinissaq pillugu immikkut piumasaqaatit atorunnaarsinneqarnissaannut aalajangersakkap atorunnaarsinneqarnera) pillugu Inatsisartut aalajangiiffigisassaattut siunnersuut.

(Ineqarnermut, Attaveqarnermut, Aatsitassanut, Inatsisit atortinneqarnerannut Naligiissitaanermullu Naalakkersuisoq)

Nualluussuup nunarsuaq tamakkerlugu suli piffissami sivisuumi tunillaassuunnerata atuukkallarnissaa imaluunniit atuuttuarnissaa naatsorsuutigineqarsinnaasumik oqarutta uniorpallaassagunangitsoq Siumumi isumaqarpugut. Tamassumalu aamma nunatsinnut minnerusumik annerusumilluunniit sunniuteqartumik atugassaqartitsinissaa aammalu atugassaqartitsigallarnissaa naatsorsuutigisassaassasoq qularnanngilaq.

Nunatsinni coronap tunillaassuutsinnaveersaarnera eqqarsaatigalugu nunanut allanut naleqqiulluta pitsaanagerusumik inissisimasimasugut Naalakkersuisut saaqqummiinnerminni oqariartuutigaat, tamannalu Naalakkersuisut siuliisa partiinik tamanik suleqateqarnermikkut coronap tunillaassuunnerata annikitsumiinnissaanik suliniarsimanerannik annertuumik toqqammaveqarmat Naalakkersuisut siulii pitsaasumik suliniarsimanerannik qutsavigiumavagut.

Nualluussuup akiornissaa anguniarlugu Oqartussaniit iliuutsit arlalissuit maannamut pereersimalerput, taamatuttaaq aamma oqartussaaffiit nunatta suli tigusiannngisaasa iluanni, soorlu suliassami uanerpiaq pineqartumi inatsisinik atuutsitsinermut suliassaqarfik aamma eqqarsaatigalugu.

Susassaqarfimmi tassani, tassalu Justitsministereqarfiup ataani Kalaallit Nunaanni oqartussaqaarfiit, soorlu assersuutigalugu pinerluttunik isumaginnittut covid-19-ip siaruaannissaa pinaveersaartinniarlugi aamma akiorniarlugi sapinngisaq tamaat atortutigut, malitassatigut aammalu inatsisitigut pitsaasumik inissinnissaat qulakkearniarneqarsimavoq.

Ukioq manna decemberip 31-ani inatsisitigut taamatut aalajangersagaqarneq atorunnaartussaavoq, tamannaavorlumi uani aalajangiiffigisassatut siunnersuummi allanngortinniarlugi siunnersuummi qitiusoq. Tassalu Kalaallit Nunaanni covid-19-ip nappaatillu allat nalinginnaasumik navianaatillit sapinngisaq tamaat pitsaallorneqarnissaat akiorneqarnissaallu anguniarlugu nunatsinni naalagaaffiup oqartussaqaarfiisa ataaniittuni siunissami sakkussatigut malitassatigullu sinaakkuteqartuarnissaq qulakkearniarneqartoq Siumumiit maluginiarparput.



Taamaaliornerup ersarissunngorlugu kingunerissavaa assersuutigalugu inissiisarfinni pulaartarnerit anisarnerillu pillugit aamma 2021-p kingorna inatsisunik atuutsitsinermut ministerip aalajangersakkanik aalajangersaasinnaanera qulakkeerneqassasoq.

Tamanna tunngaviatigut Siumumi isumaqatigisinnaasutut isumaqarfigaarput, taamaattorli inunnut eqqorneqartussanut kingunerisinnaasai eqqarsaatigalugit Ataatsimiititaliami sukumiisumik siunnersuutip qulaajarneqarnissaa piumasarissavarput, nunatsinnimi innuttaasut inuiaqatigiinni qanorluunniit inissisimagaluarunik pisinnaatitaaffeqarnerat pisinnaatitaaffeqartussaanerallu illersugassaavoq pitsaasumillu atugassaqartinneqarnissaat pingaaruteqarluni.

Siumumiit taamatut oqaaseqarluta siunnersuut Inatsisinut ataatsimiititaliamut suliareqqitassanngorlugu innersuupparput.

Anders Olsen, Siumut.